

**NATIONAL ASSEMBLY OF SEYCHELLES**

*Friday 22nd January, 2021*

*The Assembly met at 5pm*

*National Anthem*

*Moment of Reflection*

*Mr Speaker in the Chair*

**MR SPEAKER**

Prezidan Larepiblik, Ekselans Wavel Ramkalawan,  
Madanm Linda Ramkalawan, Premye Madanm.  
Vis-Prezidan Larepiblik, Ahmed Afif e Madanm Stella Afif,  
Sef Ziz Lakour Siprenm,  
Prezidan Lakour D'Apel,  
*Attorney General,*

Minis Gouvernman,

Tou nou bann Manm dan lasal, byenveni pour sa premye rankont Lasanble Nasyonal ozordi.

Byenveni osi nou bann lodyans e telespektater an deor ki pe swiv nou. Sa lokasyon ki premye rankont nou Lasanble pou lannen 2021, i dedye par legzersis nou Konstitisyon pour Ladres Prezidan Larepiblik lo Leta Lanasyon.

Ozordi nou seremoni in en pe pli senp ki abityel e sa a legzizans sirkonstans ki nou pei i ladan. Me mon oule dir pli senp pa savedir mwens lenportans. O kontrer sa levennman ozordi i enn ki tre, tre enportan pou nou e pou lanasyon Seselwa. I enportan par son moman istorik ki premye Diskour Leta Lanasyon par nouvo Prezidan Larepiblik. Me osi i enportan par sirkonstans ki nou pei i fer fas avek ozordi, ki met nou dan en sityasyon kot nou bezwen regard vreman serye travay Gouvernman e lavenir nou pei.

Avek sa Mr Prezidan Wavel Ramkalawan, mon dir ou mersi pou partaz ozordi sa moman pour sa latas Konstitisyonnal, e mon envit ou pou fer ou ladres.

**PRESIDENT WAVEL RAMKALAWAN**

Mersi bokou Mr Speaker. Mersi pou ou lakey e mersi pou sa loportinite pou mwan adres Lasanble Nasyonal e osi Lepep Seselwa.

Mr Speaker,  
Linda, *First Lady*.  
Deputy Speaker, Vis-Prezidan Afif,  
Madanm Afif,  
Sef Ziz,  
Prezidan Lakour D'Apel, *Leader* Lopozisyon,  
*Leader Government Business*,  
Minis,  
MNAs,  
Pep Seselwa.

Nou zwenn dan en moman kot nou pei pe pas dan bokou difikilte. Depi dernyen Diskour lo Leta Lanasyon e avek lepidemi COVID, Sesel in leksperyans bann premye lanmor. I annan 3 nou sitwayen Sesel ki'n kit nou. Mon ti ava demann Lasanble Nasyonal e tou bann envite annou debout an memwar sa 3 Seselwa silvouple.

***(A minute of silence was observed for 3 Seychellois who died of COVID-19)***

**PRESIDENT WAVEL RAMKALAWAN**

Mersi bokou. Mr *Attorney Zeneral*, mon demann ou leskiz pou mank ou dan mon lentrodiksyon. (Eskiz mwan.) Mr Speaker, ozordi i fer 89 zour depi ki nouvo Gouvernman in pran Lofis. Le 2 Fevriye pou fer 100 zour e parfwa ou a krwar ki nou'n fini pas plis ki 3an an lofis. Bokou dimoun pa ankor le aksepte ki se zis (99) zour, 89 zour, *sorry*.

E zot pa tro oule krwar sa parski pandan sa kourt letan in annan sitan keksoz ki'n ganny akonpli dan nou pei Sesel. Pandan sa kourt letan in annan en nouvo sans laliberte. In annan en nouvo sans solidarite parmi nou pep. Dimoun, malgre tou bann difikilte zot kapab annan en sourir lo zot figir. Dimoun i kapab komans koz ankor avek kanmarad. Me a plis ki sa, pli enportan Seselwa i kapab rekomans apresye kanmarad. Seselwa i koman dir bonzour son prosen. Seselwa i koman regard zanfan son prosen koman son zanfan.

E tou sa Mr Speaker, i fer ki sa nyaz lafreyer ki'n anglouti nou pei pandan tou sa bann lannen dousman, dousman i pe ale. E mwan mon debout devan zot ozordi pou dir avek zot sa nyaz ki anglouti nou pei ozordi pou ale, akoz nou koman en pep Seselwa nou ini dan nou lobzektif. e se dan nou linite ki nou pou kapab avans devan.

Mr Speaker, linite sa pep i pli enportan ozordi ki i ti ete yer. Nou tou nou konnen ki poudir sa linite in ganny zwe avek pandan tro bokou lannen. E ozordi letan mon komans mon diskour mon anvi dir avek zot bann Manm Lasanble Nasyonal, zot kot politik i ganny zwe, pa diviz sa pep! Pa bezwen diviz sa pep zis avek zot politik. Sa pep pa bezwen divizyon ozordi kot i ete, silvouple! Nou pou ranforsi nou demokrasi.

Demokrasi pou ganny pli ranforsi ankor. Laliberte lekspresyon ki nou Konstitisyon i garanti nou, i pou a laporte tou Seselwa. I pou a laporte Lopozisyon, i pou osi a laporte parti ki o pouvwar. Me selman mon anvi dir avek tou dimoun laliberte, wi, me selman a okenn moman annou pa bezwen swe avek striktir Leta. Annou pa bezwen ensit nou bann sitwayen, akoz *incitement* oubyen sa kalite latitid i pa pou bon pou nou pei. E mwan dan mon responsabilite koman Sef D'Eta Sesel, mon pa pou aksepte ki en tel latitid i ganny posibilite pou li grandi.

Mr Speaker, pou montre sa eleman linite, parmi mon bann premye diskour mon ti dir ozordi nou tou nou Seselwa. Letan eleksyon nou tou nou ti lev nou paviyon. Me ozordi i enportan pou nou tou lev paviyon Sesel pli o posibil. Mon ti menm al pli lwen pou dir mwan mon ti ava kontan vwar ki lo tou lakour Sesel i annan en paviyon, nou drapo Nasyonal ki flote.

E la mon ti ava kontan remersi Gouvernman Lasin atraver Anbasader ki'n fer nou kado, ki'n antann sa lapel e atraver Mer Victoria, ozordi nou annan nou 60mil paviyon pou nou partaz avek nou popilasyon an antye.

E mon ti ava kontan ki sa bann Manm Lasanble ki diriz sa loperasyon. Alors, tou Manm Lasanble zot pou ganny zot paviyon Sesel pou zot distribye. E la mon espere ki poudir tou nou distrik, ki distrik kot bann Lopozisyon ti ranporte, ki distrik kot *LDS* ti ranporte, i ava annan en paviyon Sesel ki ava vin en siny benediksyon lo sak lakour e lo nou pei Sesel.

Mr Speaker, ozordi mon'n resevwar rapor Komisyon Elektoral lo dernyen eleksyon ki'n anmenn nou. Ofet, la kot nou ete. Sa dernyen

eleksyon ki'n fer tou keksoz vin nef dan nou pei. Ou Mr Speaker, ou en Speaker nef. Sef Ziz Govinden, ou en Sef Ziz nef. Malgre ki ou pa'n ganny elekte dan sa eleksyon, me selman ou en Sef Ziz nef. Mon osi tou mon en Prezidan nef. Malgre ki seve pe vin pli blan en pe tro vit.

E dan sa rapor ki mon'n ganny sans pou mwan felisit Mr Danny Lucas, avek Mrs Manuella Amesbury, mon'n dir avek zot ki mon vremen fyer, akoz atraver travay ki zot in fer zot in ede pou promot nou demokrasi pli lwen ankor. E atraver sa tranzisyon anpe ki'n deroule, sa de sef nou pei Prezidan Faure koman ansyen Prezidan e avek mwan, nou'n kapab montre lemonn ki poudir Sesel nou'n grandi e Sesel nou respekte la demokrasi.

E ozordi parey nou tou nou konnen, plas Sesel lo Lendeks La Demokrasi i tre o, i donn nou lafyerte. E sa ki nou pe kontinyen fer kot nou les nou ganny dirize par Lalwa e bann prensip ki vremen montre respe. Montre ki mannyer nou kapab rekonnet drwa kanmarad i pe kontinyen fer nou koman en pei Sesel, kapab kontinyen grandi e ganny sa rekognisyon.

Alor ozordi letan mon pe komanse mon anvi dir annou kontinyen viv ansanm, annou kontinyen montre nou solidarite. Annou kontinyen fer nou pei Sesel mont pli o posibil, e atraver sa annou monte nou lafyerte.

Mr Speaker, pli gro *challenge* ki nou pei pe fer fas avek ozordi, se pa lot ki *COVID-19*. E sa i annan en lenpak direk lo nou lekonomi. E apre midi mwan mon pa pou ezite pou koz avek zot dan tout fransiz, nou pou adres size parey i ete e nou pou dir keksoz parey i ete. Akoz si nou pa fer sa, nou pep pou kontinyen viv dan en nyaz. Nou pep pou kontinyen kwa ki tou keksoz i *ok*. Nou pep pou kontinyen krwar ki zot kapab viv zot lavi parey zot, zot anvi koman bann endividi.

Larealite se ki Seselwa annou pa kapab viv nou lavi parye nou, nou anvi. Nou bezwen a tou moman, a sak pa ki nou pran nou bezwen absoliman an mezir ki nou mazin nou menm, nou bezwen mazin nou prosen. Nou bezwen mazin nou kominote, nou bezwen mazin nou pei.

Mr Speaker, mon bezwen dir ki mon anvi felisit Minis Lasante. Minis Peggy Vidot in pran sa Minister dan en moman pli difisil. E la mon anvi dir avek zot ki sa madanm pe fer en travay formidab. Parfwa mon demann mwan konbyen erdtan i gannyen pou li dormi,

me mon kapab dir avek zot son leker i bat pour Sesel, son leker i bat pour Seselwa. Alors Minis Vidot mersi bokou pou tou sa ki ou fer pou nou pei.

**(APPLAUSE)**

**PRESIDENT WAVEL RAMKALAWAN**

Ou vwar, letan mon dir zot annou koz laverite, annou koz direk. Omwen nou tou dan sa Lasanble nou ti devret aplodi sa travay ki Minister Lasante pe fer! Sa i montre nou ki mannyer nou kapab komans avek linite. E mwan koman Sef D’Eta sa pei, mon onte letan mon vwar sa kalite latitid negativ. Pa pou anmenn nou devan sa bann tel latitid.

Mr Speaker, lo plizyer repriz mon’n osi felisit e ozordi mon profite pou mwan felisit ankor enn fwa Dokter Gedeon, Dr Louange avek zot lekip. Mon’n ganny sans pou mwan rankontre zot lo plizyer

...

**(APPLAUSE)**

**PRESIDENT WAVEL RAMKALAWAN**

Mon’n ganny sans pou mwan asiste plizyer *meeting* e la mon anvi dir avek tou Seselwa ki sa travay ki sa lekip i fer, personn ant nou pa ti ava kontan fer. Ou konnen akoz? Akoz ozordi nou pe *deal* avek en pep Seselwa ki pa toultan ki zot ekoute. Yer bann *chiffres* lo COVID ti montre en *chiffre* environ 22. Me mon anvi dir avek zot ki sa bann *chiffres* la, i pou kontinyen ogmante.

I pou kontinyen ogmante si letan i ariv *weekend* nou ranpli tou lans. Si letan i ariv *weekend* nou deside pou nou oubliy tou bann Lalwa, tou bann restriksyon e nou al fer parti, sa bann *chiffres* pou monte.

Alor ozordi mon anvi dir avek Seselwa annou pa les nou gar tonbe! Annou swiv tou bann restriksyon, annou swiv tou bann keksoz ki Minister Lasante pe dir nou. Se zis letan nou ava pe swiv sa ki nou ava kapab avans devan, ki nou ava kapab kas sa laliny transmisyon ki ozordi in tap nou kominote. E alors, annou pa vin koz *lockdown*. E la mon anvi dir avek tou Seselwa, annou pa vin koz *lockdown*.

E an plis ki sa letan nou vin koz avek Lepep Seselwa kot ankor enn fwa dan sa demokrasi, dan sa laliberte lekspresyon kot nou les tou keksoz pase, annou silvouple pa konfiz sa pep! Annou par egzant pa premyerman dir met dout lo vaksen. E apre sa dir *lockdown*. Me selman retournen pou dir dan *sa lockdown* nou ava donn plis vaksen.

Ki vaksen ki ou pou donner? Si ou menm ou dir ki sa vaksen pa bon, ki vaksen ki ou pou donner? E la mon anvi dir avek zot se sa bann mesaz konfizyon ki pa ed nou pep. E ozordi mon anonse avek gran lafyerte ki apre ki nou'n komans nou program vaksinasyon, ozordi pti Sesel ki nou pti nou'n ariv No.2 mondyal lo donn vaksen nou popilasyon.

**(APPLAUSE)**

### **PRESIDENT WAVEL RAMKALAWAN**

Ozordi apre Izrael, nou No.2 e avek sa program ki ganny dirize par son *Manager*, Madanm Florida Bijou avek son lekip, byento Sesel i pou vin No.1 kot i konsern vaksinasyon en program efektiv.

E la ozordi mon anvi osi letan mon felisit sa lekip ki pe fer sa program vaksinasyon, mon anvi osi remerci bann ners ki'n pran zot retret, me ki akoz nou pei, akoz patri i bezwen mendev, zot in sorti dan zot retret pou zot vini, pou zot donn en koudmen. Mersi bokou tou sa bann ners. Mersi bokou tou bann Dokter, mersi bokou tou bann dimoun ki travay dan lab. Mersi bokou zot tou akoz sa travay ki zot pe fer i vreman formidab. E mwan mon tir sapo avek zot !

Letan nou pe koze la, mon anvi dir avek zot en nouvo lo vaksen in fek antre dan pei. Mon anvi remerci premyerman *Royal Highness Sheikh* Mohamed ki'n donn nou sa premye 50mil vaksen e la ozordi mon anvi remerciye Premye Minis Modi ek Gouvernman Lenn ki'n fer nou vin premye pei Lafrik ki Lenn i ofer sa nouvo vaksen *Oxford AstraZeneca*. E sa vaksen nou pou kapab donn tou nou popilasyon. Nou pou kapab donn bann dimoun ki par lao 60an. Alors mersi bokou sa 2 pei ki'n ed nou dan nou program vaksinasyon. E mersi bokou Minis Radegonde pou tou bann demars ki ou'n fer. Parske mon konnen ki poudir i pa'n fasil.

E la ankor enn fwa mon ava dir zot senpleman, vaksen ozordi dan lemonn tou pei pe rode, me i pa fasil pou tou pei gannyen. I annan serten pei espesyalman an Afrik ki pa pou ganny zot premye vaksen, ziska pli tar ki Zilyet. E letan nou, nou pou'n ariv Zilyet, nou

pou'n fini donn vaksen 70poursan nou popilasyon. E Sesel pou'n fini *achieve herd immunity*. E se pour sa rezon ki nou'n pran desizyon pou nou re ouver nou pei.

Mon anvi osi remersye tou bann dimoun ki'n volonterman vin devan, pou zot fer en kontribisyon. Letan avan mon vini dernyen *chiffre* ki mon'n gannyen, in annan en sonm R35.3milyon ki'n antre dan sa fon e sa se dimoun ki'n vini volonterman. Me la mon anvi dir zot ki avek sa larzan, non selman ki nou pou ede dan nou program vaksinasyon, me nou pou osi sey regarde ki mannyer nou pou kapab konstri sa *isolation center* ki pandan bokou lannen nou'n koz lo la. E plan Gouvernman se ki letan nou'n ariv lafen lannen 2021, Sesel pou annan en *isolation center* ki pou'n fini ganny konstri e ava pe ganny servi.

Mr Speaker, size *COVID*, byensir i konsern nou tou e alors mon anvi osi port en latansyon avek tou bann media ki donn nou en gran koudmen pou pas sa ledikasyon. Nou annan nou *SBC* avek *TeleSesel* koman 2 stasyon televizyon. Me nou osi annan bann zournal ekrir ki pran bokou letan pou zot pas lenformasyon.

E la mon ti ava demande ki sakenn antre nou dan nou prop fason silvouple pas lenformasyon. Annou dir avek dimoun *mask* ou pa met li anba ou manton, *mask* ou pa mars avek li dan ou pos, *mask* i bezwen kouver ou nennen avek ou labous.

Annou kontinyelman ansenny nou dimoun pou lav lanmen. Servi bann *hand sanitizers*. E mon vreman kontan pou vwar ki mannyer Lasanble Nasyonal zot in vreman ekipe. Felisitasyon Mr Speaker!

Donk, si sakenn parmi nou, nou fer sa bann ptipti keksoz. Frer ek ser nou pou raport laviktwar. E parey zot konnen, mwan mon en dimoun etan ki nou pa raport laviktwar mon pou arete! Sa in vin mon dezyenm non. E ozordi mon anvi dir avek Lepep Seselwa koman zot Dirizan mon pou fer sir ki nou raport laviktwar lo sa *COVID* e ki Sesel i kapab pas atraver sa nyaz pou li ale!

**(APPLAUSE)**

### **PRESIDENT WAVEL RAMKALAWAN**

Mr Speaker, parey mon'n dir o komansman i annan serten dimoun oubyen parfwa nou krwar ki poudir i annan plis ki 3an depi ki nou dan Gouvernman. Me non, pti git letan, kantite keksoz in ganny fer.

Me Mr Speaker, letan nou pe koz lo Leta nou Nasyon, serten dimoun i krwar ki poudir sa pei ki nou'n vin erite ti en pei kot tou keksoz ti pe mars byen. Ki tou keksoz ti an roz. Mon anvì dir avek zot silvouple, tir sa dan zot lespri! Sa pei ki nou'n vin erite ti en kales kase! E pandan zot deba silvouple mansyonn sa e diskite. Sa pei ki nou'n vin erite, i ti lo son zenou. Sa pei ki nou'n erite i enn ki gra, ki tro gra akòz i parey en zonnyon. Nou kapab dekrir li koman en zonnyon. Letan ou tir en kous, ou bat ek en lot kous ki apel zonnyon menm. E letan ou komans rode, partou kot ou touse, ki i dan Minister Gouvernman Lokal, ki i dan Minister ki okip Sosyal, ki i dan Minister ki okip Lanplwa, oubyen *GOP*, frer ek ser, sa ki nou fouye, sa ki nou pe vwar i sòkan.

E mwan mon anvì dir avek zot mon pa bezwen al pli lwen. *State House? State House* wi, *State House*. Koze labous plen, *State House*. Mon ava dir zot ki mon'n antre *State House* e dan biro ki mon'n antre ti napa en *file!* Ou a krwar enn ler mon ki ti premye Prezidan pou okip sa biro.

Me zis apre ki poudir mon'n mazine ki poudir nou de Minis Ferrari, en fwa nou ti antre dan sa biro pou nou dir ek Mr Rene in ler pou li ale trankilman e pa *disturb*. Se la ki'n fer mwan mazine ki poudir sa biro ti deza ganny servi, me mon anvì dir zot ki napa *institutional memory!*

Letan mon demann kestyon, napa sekirite pei. Mon sey rode, be ki'n arive dan sekirite pei? Eski i annan en *file* pou mwan kapab konnen ki bann menas ki bann soz? Parski ozordi mon osi annan sa pozisyon Komandan Sef e osi koman Sef D'Eta pou konnen ki leta nou pei dan sa bann laliny. Napa naryen! Se sa Leta nou Nasyon.

E alor se la kot nou pe komanse. E mon felisit bann Minis, parski mon konnen poudir zot pe pas en kantite letan zis pou sey konpran. E an menm tan osi mon konnen ki poudir dan bann Minister i annan bokou landrwa, kot ou a krwar sa birokrasi zot in sitan anzandre dan sa birokrasi, ki sa i en fason pou fer Lepep Seselwa soufer.

Lepep Seselwa ozordi mon pe dir avek zot, nou pou koupe sa birokrasi! E letan nou koup sa birokrasi ...

**(APPLAUSE)**

**PRESIDENT WAVEL RAMKALAWAN**



... letan nou koup sa birokrasi, nou pou annan nou en Gouvernman ki vin efikas, en Gouvernman ki deza pe montre ki poudir i kapab pran desizyon, en Gouvernman ki pou mars bokou pli vit. E bonn nouvel pou zot tou. Mon nepli resevwar 200 let par semenn. Ozordi lakantite let ki nou ganny anler *State House* in diminyen. E akoz in diminyen? Se parski bann Minis ki nou annan, se bann Minis ki konnen ki zot fer. Se bann Minis ki efikas e alors se zot ki pe reponn lapel bann dimoun e alor zot pe fer zot travay. E letan zot pe fer zot travay, zot pa regard kouler politik.

E la mon osi anvi dir avek zot ki letan en sitwayen i ekrir mwan en let e petet sa osi tou ki'n tard en pe, ki'n fer sa birokrasi vin lour. Mon letan en let i vin devan mwan, mon pa rode lekel sa dimoun, mon pa rode ki parti politik ki i sorti. Mon pa rode si i en aktivis, ki parti politik. Mon regard son konsern e si son konsern i annan merit, mon anvoy sa konsern pli devan e deswit nou ganny larepons.

Se sa lafason ki nou pe travay e se sa lafason ki nou pou avans devan. Dan sa servis piblik i annan bokou pratik ki pou bezwen arete osi. Bann pratik gaspiyaz. Bann pratik kot letan nou sorti pou nou al kot nou, nou kontinyen kit *aircon on*, nou kontinyen abize. Transpor Gouvernman ki nou roul ladan e nenport ki landrwa ki nou pa ti pou ale dan nou transpor, me dan transpor Gouvernman nou a fer sir ki i ale.

Telefonn ki ankor enn fwa ganny servi, non pa pou biznes Gouvernman me pou bann konversasyon personnel. Bann *computers* ki ankor enn fwa tro bokou kart i ganny zwe lo la. Nou pa en Gouvernman kot travayer i sipoze vin zwe kart lo *computer*. Nou sipoze vin travay.

E annou pa bliye osi sa koripsyon. Koripsyon i kontinyen annan. E la mon avi dir avek tou *civil servants* ki poudir sa Gouvernman ki ozordi i la, pa pou tolere koripsyon e atansyon. Atansyon ki letan nou komans *deal* avek koripsyon, apre zot travay zot dir Gouvernman in sanze, viktimizasyon. Non. Pa bezwen kriy viktimizasyon, me regarde kwa ki ou pe fer. Ki mannyer ou pa pe fer sa ki ou devret fer e ou ava konpran akoz serten kontra pa ganny renouvle.

Ou ava regarde akoz serten lezot kondisyon i ganny azoute. E la permet mwan pou mwan dir avek zot wi pou annan plis kontra ki pa pou ganny renouvle. Akoz mwan mon anvi en Gouvernman ki efikas. E sa mon'n repet a plizyer repriz avek bann Minis nou pa en

Gouvernman ki pou anploiy dimoun me ki pa pou fer en travay ki zot sipoze fer.

E an plis ki sa mon ti a kontan dir avek tou bann travayer dan sekter piblik, tou bann *civil servants* dan bomaten, letan zot kit dan lakour pou zot vin travay, silvouple kit zot politik kot zot! Pa bezwen met li dan zot kaba, pa bezwen met li dan zot sak, kit li se zot tak zot laport desann vin travay.

Akoz politik pa pou ganny tolere dan servis piblik! Servis piblik i la pou servi tou sitwayen dan nou pei e non pa zis en group! E mon tande mwan, serten ki dir, "Gouvernman ki'n sanze me mwan mon pou kontinyen avek menm prensip!"

*Sorry wrong attitude.* Gouvernman in sanze, prensip osi tou in sanze e si ou anvi kontinyen avek menm prensip, i annan zis en keksoz, sa biro, sa pozisyon ki ou pe okipe, i pa sa pozisyon ki ou devret pe fer. Ou devret pe travay dan en lot landrwa e non pa dan sekter piblik.

Dan sa menm lespri *DPA* pou pas dan en transformasyon. Ozordi tou dimoun i koz lo *DPA!* *DPA* in vin en mons ki dimoun pa kontan; *DPA* in vin en lorganizasyon. E mon'n war ki mannyer i marse. Mwan koman Ladministrasyon i tonm anba mwan, mon'n war ki mannyer mon'n bezwen asiste bann *meeting* pou regarde si pou renouvle kontra entel. Si pa pou renouvle kontra entel, si i pou ganny en promosyon, si i pa pou gannyen.

Be sa pa sipoze mon responsabilite sa!

*(Off-Mic)*

### **PRESIDENT WAVEL RAMKALAWAN**

Ou war ki mannyer zot maleve? Zot tou dan sa Lasanble zot pou ganny sans reponn. Ozordi i mon tour koze, les mwan koze *US*, apre zot ava reponn! Pou donn zot tou letan pou zot reponn!

***(APPLAUSE)***

### **PRESIDENT WAVEL RAMKALAWAN**

Mr Speaker parey mon'n dir *DPA* i vin sa nespes mons ki regard tousala. Me mon Ladministrasyon, nou, nou krwar poudir Minis avek son bann Egzekitiv, *PS* avek son bann Direkter se zot ki pli

konnen ki mannyer zot Minister pe deroule. Se zot ki pli konnen lekel sa travayer ki merit en promosyon. Se zot ki konnen lekel sa travayer ki malgre i napa serten bout papye son travay i vo plis ki serten ki annan mil bout papye.

Alor sa bann desizyon i pou al dan bann diferan Minister. E nou anvi war serten transformasyon kot *DPA* i a vin plito ede lo nivo administrativ pou drafte bann kontra pou dir zot ki mannyer bann serten striktir i kapab ganny amelyore, me solman responsabilite final i pou lo sa Minis ki diriz son Minister, avek son Ladministrasyon dan son Minister.

Mr Speaker, mon vin lo en pwen enportan e sa i konsern nou pep Seselwa. Pep Seselwa Mr Speaker ou konn sa pli byen ki mwan, nou ti en pep ki ti lev granmaten. Nou tou ki la ki dan Lasanble e ki pe swiv mwan, nou rapel nou bann granpye ki ti leve avan ki soley i leve, ki ti okip zot bann zannimo; ki ti met lord kot lakour, avan ki zot ti ale pou al travay. Avan ki zot ti al dan bwa pou al bat kannel. Avan ki zot ti al raport *PWD*; avan ki zot ti ale pou al fer nenport ki travay.

Se Seselwa ki'n konstri *State House*. Seselwa ki'n konstri *Domus* ek tou bann legliz atraver Mahe, Praslin ek La Digue. Se Seselwa ki'n fer tousala. Kestyon ki nou demande be ki'n arive avek nou Seselwa?

Ozordi tou batiman ki ganny konstri se etranze ki fer. E malerezman sa nespes maladi ou a krwar in penetre dan nou lazenes. Lazenes ozordi i krwar lavi se anmize, lavi se fer en pti keksoz pou ganny en larzan vit. Lavi se annou pran en bwar. Annou pik eroin dan nou lavenn. Me non! Mon anvi dir avek Seselwa ki sa mantalite fodre i sanze e nou pou fer si ki i sanze!

Mon anvi dir avek Seselwa ki dezormen ki travay dir ki bezwen diriz nou. Letan nou pe rod konstri sa nouvo Sesel i annan zis en fason ki nou pou fer li se travay dir. E vreman Mr Speaker nou pou bezwen annan en sanzman mantalite dan nou pep. Me mon anvi pa met tou Seselwa dan menm pannyen. I pou mal pou mwan fer sa.

Mr Speaker yer letan en zenn garson – en zennonm in vin fer en donasyon anler *State House* – en donasyon R100mil, i pe rakont mwan ki mannyer i annan li 7 travayer Seselwa. E pourtan son travay i en travay ase spesyalize. Prezan mon dir li, “ Be ou osi ou annan serten travayer etranze ki pe travay avek ou?”

I dir mwan,” Non.”

I dir, “Mwan mon annan zis travayer Seselwa.”

I dir mwan, e napa enn ki raport travay an retar. I dir mwan i annan enn son travayer ki’n travay pandan 14an avek li, in annan li zis 3fwa pandan sa 14an ki in mank travay akoz i ti malad.

Mon dir, “Sapo mon frer! Se sa kalite Seselwa ki nou bezwen!”

I donn mwan lafyerte letan mon regard en lenstitisyon pli enportan dan nou pei parey Labank Santral, ki son *staff* i 100pousan Seselwa. 100poursan Seselwa! Seselwa kalifye, Seselwa ki’n al liniversite. Seselwa ki’n retournen avek bann Degree. Seselwa ki’n depans, ki’n fer pli byen ki bann etranze letan zot ti pe etidye e ozordi se zot ki gardyen nou lekonomi dan bokou sans. Alor sa i donn mwan lafyerte.

E la mon anvi dir Mr Speaker, letan mon regard sa lekip ki travay avek mwan *State House*, sa group dimoun ki pli pre avek mwan ki tou le bomaten letan mon vini mon war zot. Set en group travayer!

Mon salye zot! E mon toultan dir avek zot, “Fantastik!”

Zot la bomaten pou regarde ki program lazournen. Si mon dir mon ariv 6.30, zot la 6.30. Si mon pe ariv plitar zot la prezan. E sa group dimoun zot pa regarde, si Sanmdi, si Dimans, si i annan travay pou fer zot pou la. Zot pa regarde keler zot pe fini. Ler nou fini lanmenm.

Alor mon anvi salye mon lekip ki otour mwan anler *State House*. Akoz si tou Seselwa ti pran sa menm latitid kot zot pa mank travay Lendi bomaten, kot zot pa zis viv lo *sick leave*, oubyen zot anvi en 13enm Mwan me zot pa pe delivre parey zot devret delivre. Si zot ti swiv sa legzanp Mr Speaker, nou ti pou vin en pep ki ti pou avans bokou devan.

E la mon oule osi felisit Lasanble Nasyonal. Mr Speaker, “Felisitasyon!” Akoz Lasanble Nasyonal i en lot lenstitisyon kot i annan zis Seselwa ki pe travay e mwan mon’n pas en kantite lannen isi Lasanble sa dernyen 4an e mon’n war mannyer *Clerk, Deputy Clerk, Sergeant* e tou bann lezot, zot tou zot pe fer en travay formidab.

Ozordi mon anvi salye tou bann Seselwa ki pe vreman fer nou fyer e ki pe donn nou sa lankourazman ki poudir travayer Seselwa i kapab leve pou li partisip dan transformasyon nou pei e se sa ki nou anvi!

**(APPLAUSE)**

**PRESIDENT WAVEL RAMKALAWAN**

Mr Speaker dan sa konteks, mon anvi anonse ki pou annan en nouvo Polisi kot *GOP* i konsernen. Sa ki nou pe dir se Seselwa premye! Seselwa premye! E la mon anvi vremen remersye Minis Patricia Francourt; remersye Minis Fonseka; remersye tou bann dimoun ki pe regard sa nouvo Polisi.

Anba *ASP* zot pe fer en travay ekstraordiner kot nou pe balanse. Seselwa premye akoz parski nou pa anvi renouvelman otomatik en *GOP*. Nou anvi premyerman regarde si napa en Seselwa dan sa landrwa travay ki kapab fer sa travay. E nou tou nou osi konnen – e nou konnen bann zes ki’n arive dan lepase, soutire par bann Minis e bann lezot ki ti O dan Ladministrasyon, ki ti dir pa trakase zis met en pti lanons lo *NASYON* e apre sa retournen dir ou pa’n ganny okenn Seselwa alors nou ava anploy en etranze.

Me non selman sa, in menm annan bann moman, bann lenstans, kot travayer etranze in fini ariv dan pei, in deza pe komans travay e apre en pti koze isi, en pti koze laba tou keksoz i ganny regularize.

Alor Mr Speaker non. Ozordi nou annan en kantite travay – kantite lanplwa, kantite pozisyon kot bann diferan landrwa pe rode. E avek sa sityasyon *COVID*, nou osi trouv sityasyon kot i annan bokou dimoun ki pe asize kot zot pe esper *FA4JR*. Taler mon pou vin lo la. Me nou, nou anvi ki tou bann dimoun i kapab ganny ofer sa pozisyon.

Se pour sa rezon ki letan en dimoun i fer laplikasyon pou ganny en *GOP* i pou bezwen koz avek Minister Lanplwa. I pou bezwen koz avek zot e Minister Lanplwa, si par egzanp i pe rod en *waitress or a waiter* koman en legzanp, i ava dir, ‘lala nou annan en lalis la, bann Seselwa. E alor non, pran sa Seselwa. Donn li sa plas travay.’

Be mon konnen ki larepons mon pou gannyen. Pou annan bokou bann anlwayer ki pou dir be Seselwa i pares. Seselwa pa pe fer sa ki vremen mon anvi zot fer. Seselwa nou, nou pe koz manze lo zot latab. Nou, nou a pe koz ki mannyer zot pou ganny en plas travay, olye en etranze vin dan nou pei, e alor mon pe dir avek zot, “Travay silvouple! Travay!”

E an plis ki sa mon anvi osi azoute, pa krwar ki poudir si ou pa al travay, ou pou zis desann e ou pou ganny lasistans sosyal! Lasistans sosyal pou annan kondisyon atase avek li! Son kondisyon

prensipal se ki ou travay. E lasistans sosyal nou pa sipoze viv lo lasistans sosyal. Lasistans sosyal i sipoze en soulazman tanporer avan ki ou bouz pli devan pou ou ganny en plas travay.

E la mon anvi vreman mon admir Onorab Naddy Zialor. Onorab konbyen fwa nou, nou'n trouv li avek son dezabilite, oubyen son abilite alternativ, nou 'n war li lontan pe koup semen pou li al lo *bus stop* pou li pran son bis pou li retourn Grand Anse? Me set en zennonm ki ti ape debourye. Pourtan i ti kapab zis asize e dir, "Mon ava resevwar lasistans sosyal!"

E regarde mannyer in kapab debourye. Akoz in determinen ozordi, i pe asiz dan nou Lasanble koman en Manm Onorab. Alor mon anvi dir avek Seselwa, letan nou leve pou nou travay olye zis depann lo *welfare* se sa ki pou permet nou pou nou monte, pou nou ganny sa gou pou nou travay. Se sa ki pou permet nou pou nou ganny promosyon pou nou kapab anmenn en pli bon lavi dan lakour. Pou nou kapab donn nou zanf an pli bon lavenir.

Alor mon pe dir i annan tro bokou etranze ki pe travay dan nou pei. E lakantite etranze ki pe travay dan nou pei, i annan en relasyon direk pou fer avek nou lekonomi. Sak fwa ki ou pey en etranze, sa Dolar ki ou pey li, i a pe kite i pe al dan son pei. Pa ti kapab kit sa Dolar isi pou nou donn en Seselwa?

E an plis ki sa, pep Seselwa Mr Speaker, mon anvi dir klerman, dezormen en etranze ki vin Sesel lo en *GOP* i pa pou ganny drwa fer en 2enm travay. Mon ape sey delarg lanmen Seselwa menm mwan! Mon ape sey delarg lanmen Kreol menm mwan! Sa travayer ki vini koman en mason, koman en sarpantye ki pe travay avek en lakonpanyen konstriksiyon i pa pou ganny drwa vin fer en 2enm travay.

Akoz frer en ser ozordi sa bann travayer etranze, zot in konnen ki mannyer pou sarz bokou larzan! E sak sou ki i gannyan pa reste Sesel sa. I ede pou li ale! E nou spesyalman dan sa moman kot nou ete la, nou bezwen gard sak Dolar ki nou kapab dan nou lekonomi.

Me letan mon pe dir sa ki mon pe osi demande? Mon pe demande ki Seselwa nou sanz nou latitid ver travay. Mon pe demande ki Seselwa - sa pti kontrakter, sa mason, sa sarpantye arete dir avek sa dimoun ki vin regard ou pou fer en travay, arete dir avek li, "Sanmdi 9er mon pe vini." Me apre sa ou pa vini oubyen ou vini ou met 2 blok e apre i pa war ou pou 2 semenn! Zot konpran mwan ki mon pe sey dir?

Seselwa letan nou donn en langazman, annou pran nou langazman. E annou fer travay dir vin sa moto, vin sa lankourazman ki nou rezervwar parski se sa ki pou permet nou reganny ankor lespri nou bann granmoun.

Mwan mon ti annan en papa ki ti en ferblantye. I ti al dormi apre 10er diswar. Parfwa nou ti dir avek li, “Papa ou a pe *disturb* vwazinaz.”

I ti dir, “Mon bezwen fini sa larozwar akoz sa larozwar la, se sa ki pou permet mwan pey ou ledikasyon.”

I ti leve granmaten – 5er bomaten i ti leve pou li donn manze koson ankor enn fwa pou li ganny en lot pei keksoz. 7er bomaten i ti’n fini raport travay *PWD*. Be kote sa lespri in ale? Eski sa lespri nou pa kapab ganny li ankor? Akoz ki serten parmi nou ki la dan sa lasal, nou annan sa lespri, sa lespri pou nou travay dir, sa lespri pou nou toultan sey regarde ki mannyer nou kapab ganny en lot 5sou, oubyen pou nou rann servis nou kominote.

E sa osi tou nou bezwen rebran. Apre midi en madanm zisteman i telefonn mwan i dir avek mwan, “*Father* i enportan pou nou dan sa moman difisil pou nou kapab ed kanmarad.”

Lontan si ou ti mank en pti git disel, ou ti kriy ou vwazen ou ti anvoy ou zanfan ou ti dir, “Donn mwan en pti git disel. Donn mwan en pti git disik. Mon pe fer mon bouyon la i mank mwan en latet zonyon. Pret mwan apre mon ava rann ou.”

Me se sa ki fer nou Kreol!

Se sa ki’n fer nou Seselwa! Se sa ki’n *build* nou *up*. Alor mwan mon pe dir Seselwa annou retournen avek sa latitud. Annou arete egois e annou mazine ki pou dir se dan sa fason, ki nou pou kapab avans nou pei pli devan. Se dan sa fason ki nou pou kapab vreman vin en pep ki solid – en pep ki fyer.

Dan sa menm laliny ankor enn fwa i malere, ki poudir sa mo *URS*, i annan dimoun pou zot i vin *UPS*. Sa mo ‘*R*’ in vin en ‘*P*’. Sa mo *Relief* in vin *Permanent*. *URS* set en *Unemployment Relief Scheme*! Se zis ankor enn fwa i degaz lasasen. I en pon pou ou sote. Ou pa reste lo sa pon me malerezman sa Gouvernman avan – sa Ladministrasyon avan in fer sa vin en pon ki ou reste lo la! Nou, nou anvi refer li vin en pon ki ou pa ganny drwa reste lo la.

Donk mon anvi dir bann dimoun – e la ankor enn fwa sa semenn e mon pou koz avek Minister Lasante, sa semenn en zenn ki pe travay – zisteman i lo *URS* me ki pe travay avek Minister Lasante, i dir avek

mwan; i dir mwan,” Mon ti ava kontan konnen ki pou arive avek nou akoz mwan, mon anvi travay! Mon anvi fer *training*. Mon’n travay avek bann dimoun dan bann lenstitisyon ki pe regard *COVID* e mon pe ganny sa leksperyans. E mon ti ava kontan vin en asistan ners.”

E mon dir avek li, ”Mon fiy lala sa latitid ki nou bezwen dan sa pei. Sa dimoun ki lo *URS*, i regarde ki mannyer i pou kapab sanze e ki an menm tan osi i ganny konpran ki poudir sa i en *Relief Scheme* alors Minister Lanplwa laba kot *ASP*, zot pou ed sa bann dimoun pou kapab bouze.

E an menm tan letan nou pe koz lo sa mo, mon regarde mwan - mon konnen i annan bann dimoun ki parfwa zot kale lo *URS*. Mazorite zot se bann zenn madanm ki annan zanfan. E la mon anvi fer en lapel direk avek bann zonm ek bann fanm dan nou sosyete. Mon anvi dir avek zot, fanm ek zonm – parski pa zis madanm ki anmenn zanfan o monn. Zonm tou i ede pou anmenn zanfan o monn.

Zonm ek fanm annou pran nou responsabilite! Annou pa anmenn en zanfan o monn si nou konnen poudir nou pa puo kapab pran swen avek sa zanfan. Mon’n deza dir Linda son leker in kase e mwan osi tou mon leker in brize, ler nou ti fer parti pou bann zanfan ki reste dan bann fwaye. Serten dimoun apre ki mon’n dir sa in dir, “Ar ou pa konnen akoz bann dimoun i laba. I annan ki fanmir in kase ensidswit!”

Me zisteman be letan ou fanmir in kase, me eski ou zanfan osi tou in kase? Ou fanmir i kapab kase, ou relasyon avek sa madanm oubyen sa msye i kapab kase. Lavi sa, me ou relasyon avek ou zanfan pa devret zanmen kase!

Ou devret kapab pran ou responsabilite, anmenn sa zanfan kot ou pou ale. Si ou pe reste dan en landrwa dan en lasanm anmenn ou zanfan akoz i apel ou zanfan! Alor annou pran sa responsabilite. Si ou pa ankor pare, Servis Lasanble i donn ou tou sa bann posibilite pou planifye. I annan *Family Planning*. I pou nanryen sa. Alor annou al dan sa direksyon.

Donk *URS* pou ganny revize e Minis Finans i ava donn bann detay lo la e dan sa fason nou ava kapab bouz devan. Nou Gouvernman pa pou zis donn dimoun en pwason pou li kwi. Parey sa proverb Sinwan i dir, nou, nou anvi donn nou pep en laliny avek en lanmson. E nou a donn li premye labwet e apre sa nou ava dir li debourye, al lapes, debourye, debout lo ou lipye.



Mr Speaker, nou lekonomi pa bon. Mon'n dir lo plizyer repriz i lo *ZERO!* Letan nou dir *NAPA*, i vedir *NAPA!* Yer letan biznes in fini pou lazournen, sa larzan ki nou'n prete avek Labank Santral, sa laliny depans ki nou annan, nou ti'n depans 32milyon an plis. Nou ti *minus 32million*. Se sa ki mannyer nou lekonomi i ete ozordi.

En zour nou'n desann ziska *minus 252million* e apre sa apre ki nou'n ranmas en pe taks, *SRC* in fer en travay dan bann lezot reveni, nou'n monte, apre sa nou'n desann apre la parye mon'n dir zot yer nou ti *minus 32million*. Alor pou nou refer sa lekonomi i bezwen nou tou. Nou vini koman Seselwa. Nou pe osi sey rod atir investiser me nou tou nou bezwen donn en koudmen.

E la ankor enn fwa mon pou di byen for," Napa plas pou politik dan rekonstriksyon nou pei!" Napa plas ki pou anmenn nou devan kot enn avek enn i fer 20 oubyen nenport ki sif ki anvi mete.

Ozordi se moman pou nou tou regarde ki mannyer nou kapab fer nou biznes grandi; ki mannyer nou kapab ankouraz en dimoun pou li pran en plas travay e an plis ki sa ki mannyer nou kapab nou menm nou vin devan e dir la i la ki mon kapab fer. En pe parey bann biznes pe vin devan pou zot donn en koudmen. E ou war ki latitid? Serten latet pa bon.

Letan dimoun i vin devan pou donn en koudmen dan sa sityasyon *COVID*, lezot i fer komanter i dir," Ar zot ti kapab pey zot travayer 13enm Mwan!"

Me non annou sanze sa kalite latitid! Annou pran en latitid pozitiv! Annou regarde poudir letan en dimoun i met dan son pos, pou li ede. I a pe ede pou pei avanse. Alors nou bezwen tou lanmen - *hands on deck parey* nou dir. I annan bokou lenvestiser ki anvi vini e an menm tan nou bezwen koup bann kou ki pou kapab.

Par egzanp ozordi mon pou fer en lapel direk avek bann dimoun ki pa pey zot taks. I annan bokou bann marsan spesyalman bann retailers ki sarz dimoun *VAT* me apre sa bann larzan *VAT* pa zanmen ariv kot *SRC*. Silvouple si ou sarz dimoun *VAT* fer sir ki sa larzan i ariv dan biro kot taks ki ganny anmase.

Mon bezwen osi dir avek tou nou bann dimoun annou aret enport bann keksoz ki mwan direkteman mon apel zot *rubbish*. Annou *focus* lo bann keksoz esansyel. Parski sa fwa ki nou enport sa bann gonaz ki fer nou bann zanfan vin obese, ki fer nou bann zanfan perdi direksyon, se nou pei ki ou pe detri. Alors silvouple annou fer sa.

Mon pou osi demande ki bann landrwa kot Gouvernman pe lwe, la dan sa moman kot nou pei i bezwen nou, kot nou tou parey sa gran Prezidan Ameriken ki dir, “Pa rode kwa ki ou pei i kapab fer pou ou, rode kwa ki ou, ou kapab fer pou ou pei!”

Frer ek ser ozordi an Zanvye 2021, nou lo sa staz. Annou rode kwa ki nou kapab fer pou nou pei. E nou pou demande ki tou bann dimoun ki lwe, swa batiman kot nou met biro Gouvernman ki annan tro bokou e nou bezwen koupe oubyen bann lakaz ki Gouvernman i lwe nou pou demann zot pou donn nou en *discount* dan sa moman difisil.

Mr Speaker letan mon pe koz lo bann depans mon a zis donn zot enn de sif ki nou’n vin zwenn. Zis pou lakaz ki Gouvernman i lwe toulezan i ariv R125milyon, pou bann etranze sa. Bann biro ki Gouvernman i lwe i ariv R187milyon.

Sekirite kot bann lekol, kot bann lenstitisyon Gouvernman R195milyon. Zis sa 3 sif ki mon’n donn zot la, i ariv R507milyon. Eski nou pei i kapab kontinyen pey sa? Larepons se non, nou pou bezwen koupe.

*Part rental*, bann dimoun ki Gouvernman i pey lanmwatye zot lakaz. Avan Zen ti annan 160 dimoun ki ti lo *part rental*, an mezir ki eleksyon in arive, bal in ganny donner menm.

Ozordi i annan plis ki 300 dimoun ki Gouvernman i donn zot *part rental*. E sa i en sonm ki depas R1milyon tou le mwan.

Sa proze zis avan eleksyon ki pou ganny vot, ti dir donn tou dimoun ki annan en *loan* 25poursan *discount*, kout Gouvernman R42milyon. Letan ou azout tou sa bann sif ansanm, mon bann ser ek frer i vin en ta milyon.

E la mon pou dir zot, ki letan Minis i ava prezant Bidze, nou’n sey fer tou keksoz ki nou kapab pou nou koupe, pou nou redwir. E menm pou nou regarde ki mannyer nou kapab ferm serten lorganizasyon. E wi, pandan sa mwan Fevriye i annan serten lorganizasyon paraetatik ki pou fermen e sa i ava fer lekonomi.

Zis bann *Board*, mon ti nonm sa en fwa dan mon premye diskour. Sa ki nou’n konte i annan 108 *Board* dan nou pei. E sa 108 *Board* i kout Gouvernman R36milyon dan en lannen. La mon kapab dir zot deswit, nou’n deza komans fer en travay pou nou koupe sa bann *Board*. Nou pou koupe.

I annan bann Lalwa ki pou vin devan zot isi. Kot zot pou war ki *Board* pe ganny koupe. Parski i annan bokou lenstans kot travay i kapab fer san en *Board*.

Bann *civil servants* ki pas zot letan dan *meeting Board* aköz zot lo plizyer *Board* pandan ler travay, zot pa pou gannnen peye *Board fees*. Se si zis *meeting* i ganny fer an deor ler travay e pou sak fwa ki zot asiste.

Parske i annan serten dimoun zis i ganny son larzan, me solman i pa asiste bann *meeting*. Oubyen bann *Board* zot menm zot, zot pa zwenn.

Alors tousala pou ganny fer pou nou sanze, pou nou kapab anmenn nou pei pli devan. E alor parey mon'n dir, i annan serten lenstitisyon ki pou fermen e zot responsabilite fasilman i ava kapab ganny partaze avek bann lezot.

Moman in arive osi dan sa lespri pou nou realist. Ozordi *Air Seychelles* i reste en gro problem pou nou pei. *Air Seychelles* i drwa pli ski R800 milyon dan *loan*.

E *Air Seychelles* ozordi i pa kapab soutenir son lekor. E dan Bidze ki pe vin devan zot, *Air Seychelles* pe rod laprobasyon en lot R109milyon zis pou pey saler bann travayer.

Frer ek ser, nou bezwen pran en desizyon. E sa Gouvernman ki mon dirize, i en Gouvernman ki pran desizyon. E pou le moman, mon pe dir avek zot, mon ti ava kontan ekout zot letan zot pe fer zot bann larepons dan lafason ki zot koz lo *Air Seychelles*.

Eski moman pa'n arive pou *Air Seychelles* port son latansyon plis lo *domestic* avek *ground handling* e pou nou les ale sa bout enternasyonal, ki se li ki a pe kout nou pei tou sa ta milyon Roupie. Sa i kestyon pou zot reponn e nou ava ekout zot.

Dan sa menm lespri, letan nou pe koz lo nou lekonomi, e parey zot in aprann, ki poudir nou vreman anvi war ki nou lekonomi i rebran. Nou'n deza anonse ki poudir, dezormen, en touris ki'n ganny son vaksen, apre 2 semenn i kapab rantre dan pei san ki i bezwen fer karantenn.

Nou'n osi anonse, e nou target se pou nou, par dan milye Mars, oubyen nou apel li dan mwan Mars, pou nou kapab, letan nou'n *achieve herd immunity*, pou nou kapab reouver nou bann frontyer, pou ki touris i kapab vin dan pei, pou zot kapab san ki zot pas atraver karantenn e zot ava kapab *enjoy* nou labote ek nou lospitalite.

Ankor enn fwa i annan bokou travay ki pe ganny fer. E tousala se parski nou rekonnet ki poudir an mezir ki lapas i kontinyen fer progre, me pou le moman se nou Lendistri Touris ki ankor en lendistri ki pli byen organize.

Alor tousala i bann fason kot nou pou kapab ranforsi nou lekonomi an mezir ki nou atir lenvestiser, an mezir ki nou pey *tax* ki fodre peye. An mezir ki nou fer tou sa ki nou devret pe fer.

Donk dan sa konteks, letan nou balans osi sa ki nou napa, nou ariv lo sa size *FA4JR*. *FA4JR*, bann ki ti dan Sizyenm Lasanble, savedir enkli mwan, nou konnen ki poudir, nou ti met en Bidze e sa program ti sipoze ale ziska Desanm.

Me ankor enn fwa politik in gat tou keksoz. Kot en moman ti a pe fer serten *scrutiny*, apre sa pli nou'n ariv pli pre avek Oktob, tou tiyo in ganny large. In dir pa bezwen fer ankor sa *scrutiny*.

Nenport dimoun ki oule vin devan, zot ava ganny peye. E sa in fer ki larzan in devide. Me Lepep Seselwa in vwar atraver tou sa bann demars.

E si mon'n mansyonn sa, pep Seselwa, Mr Speaker, bann Manm Lasanble, se parske mon anvi dir avek zot, ki mannyer sa Gouvernman ki'n la avan, i pa'n azir dan en fason responsab!

I pa'n regard pli devan, in plito mazin an term ganny en eleksyon. Be mwan mon pa pe mazin an term ganny en eleksyon mwan! Mwan mon lentere se ki mannyer nou fer sa pei ki apel Sesel bouze.

Ki mannyer nou partaz sa larises ki nou pei i prodwir. Mwan mon pa pe rod deba pou vin *Leader* en parti politik! Mon pa pe rod lanbisyon!

Mwan zot in donn mwan sa poursantaz 55poursan e apre sa zot in elekte en mazorite *LDS* dan sa Lasanble, pou nou kapab vin travay pou sa pei. E alor annou kontinyen travay dan sa direksyon silvouple!

**(APPLAUSE)**

### **PRESIDENT WAVEL RAMKALAWAN**

Donk Mr Speaker, dan mwan Zanvye *FA4JR* pou ganny peye parey i ti ganny peye an Desanm. E sa nou pe fer li avek bokou soufrans koman en pei. Me nou pa anvi dimoun zis i perdi lanplwa, nou pa

anvi zis dimoun, parske nou'n ariv le 22 la, i pou mal pou nou anons en keksoz pli strik.

E mon konnen ki poudir Minister Lanplwa avek Sosyal pe travay lo la. An Fevriye e an Mars sa sonm ki ganny peye pou koupe. I pa pou koup a 100 pousan, me i pou ganny en rediksyon e Minis Finans i ava anons sa.

Me apartir le 01 Avril 2021, *FA4JR* sa *Scheme* pou nepli egziste. Tou dimoun ki lo *FA4JR* ozordi zot ava ganny lankourazman pou zot ganny en lot plas travay. Me mon bezwen osi dir ki malerezman i pa'n annan ase sipervizyon lo sa *Scheme FA4JR*. Mon pa kapab ganny en konpran, ki mannyer serten lorganizasyon, spesyalman dan Lendistri Touris in kapab resevwar *FA4JR*, me an menm tan pe kontinyen anploy etranze.

Me non selman anploy etranze, me pe demann renouvelman zot *GOP* oubyen pli pir ankor pe *apply* pou nouvo *GOP*! Be ki ...? Mon pa ganny en konpran mon sa bann kalite keksoz.

Parski i pa azoute, i annan en keksoz ki mal kek par. Be nou, nou anvi vin koman en Gouvernman ki serye e ki avanse. Donk *FA4JR* zot ava ganny plis detay lo par ki pousantaz ki pou ganny redwir.

Me selman mon kapab dir avek tou bann anplwayer, tou bann travayer, apartir le 01 Avril *FA4JR* koman *Scheme* ki kot Gouvernman i asiste sekter prive i pou ganny aboli, i pou nepli egziste.

An menm tan Mr Speaker parey mon'n koze oparavan, mon'n dir ki koripsyon i enportan pou nou lager kont li. E koripsyon i annan en kantite. Se letan mon'n asiz dan sa sez ki mon'n dekouver ki kantite koripsyon ki annan.

E pou sa nou pou ranforsi *Anti-Corruption Commission*. E sa *Board* ki ozordi i resevwar en sonm R1.8milyon pou ganny dizourd. Nou pou anmenn bann lamannman dan Lalwa Komisyon Anti-Koripsyon.

E nou pou demande ki sa *Board* i ganny retire e i ava ganny ranplase avek en striktir ki ava ganny anonse. Me selman nou pa pou tire sa larzan avek Komisyon Anti- Koripsyon.

Nou pou servi sa larzan pou nou pey pou 7 investigater. Pou 7 dimoun kapab fer plis travay. E si nou'n pran sa desizyon, e la nou espere ki Mrs May De Silva koman son *CEO* i pe ekout mwan byen, nou pou ekspekte rezilta!

**(APPLAUSE)**

**PRESIDENT WAVEL RAMKALAWAN**

Nou pou ekspekte ki sa bann laliny koripsyon lenvestigasyon apropiye i ganny fer. E rezilta i ganny anmenn devan. E mon'n deza dir ki Lalwa ki par lao nou tou. E letan mon pe dir Lalwa i par lao nou tou, mon pe dir tou dimoun ki pe ozordi antreprann bann akt koronpi, mon pe dir avek zot gara zot!

Parski apre sa, pa bezwen vin kot *MNA*, pa bezwen vin kot mwan, akoz Lalwa ki pou diriz tou keksoz. Mon anvi pandan sa lannen 2021 war rezilta.

E si lafen 2021 nou pa war rezilta, letan mon ava fer *SONA* an 2022, mon ava dir zot Anti- Koripsyon sa Komisyon pe fermen. Donk Mr Speaker ozordi nou tou nou bezwen travay serye. Lo en kote nou pe dir linite pou nou pep. Tir politik kot i pa devret ete. Vin avek politik serye. Nou annan nou en demokrasi kot Lopoziyon i annan tou posibilite pou li fer son kontribisyon. I kapab fer son kontribisyon.

Personn pa pou swiv ou. Personn pa pou ekout ou telefonn. Pou napa okenn Tonton Makout ki pou fer letour ou lakaz aswar. Ou kapab dir sa ki ou oule. Me selman pa bezwen fer okenn *incitement*. Akoz sa ou ava pe sot en pti gin.

Alor Lopoziyon, mon demann zot ozordi pou zot osi tou anmenn en kontribisyon serye. E la mon anvi dir Onorab Gill, felisitasyon mon frer, mon admire ki mannyer ou pe travay. E mon admire ki mannyer nou de nou travay. Mon apresye ki mannyer ou rantre dan ou kominote.

E letan Lopital Baie Ste Anne i bezwen keksoz, mon war ou ansanm avek bann lezot, lo *Praslin Business Association* ek bann lezot endividi, pe vini. Akoz ou annan en leker pou ou distrik.

**(APPLAUSE)**

**PRESIDENT WAVEL RAMKALAWAN**

Si nou tou, si nou ti travay avek sa lespri, nou ti pou avanse. Donk nou bezwen met de kote sa bann politik ki pa pou anmenn nou ansanm koman en pep.

Katriyenmman letan nou pe dir nou pep, nou bezwen vin en pep ki travay, annou sakenn ankouraz dimoun pou travay. Annou sakenn met en zefor pou nou fer sir dimoun i travay.

E lo lot kote, la mon lans en lot *challenge*. Parske nou tou nou konnen ki poudir ozordi drog i kontinyen vin sa eleman dan nou sosyete ki pe retard nou bann zenn. E mon'n donn *warning*.

Mon ti vin isi an Novanm, mon'n donn *warning*. Lo lezot plato mon'n donn *warning*. Ozordi mon anvi donn *warning* final. Mon anvi dir avek tou bann trafiker drog, zot in fini ganny zot dernyen *warning*.

Silvouple aret anpwazonn nou bann zenn! Nou pe vin apre zot. E nou pe vin apre zot san pitye. Nou pe vin apre zot pou nou liber nou bann zenn.

Sa bann zenn ki zot in fer bann lesklav avek. Nou pa pou regarde kote ou ete. Nou pa pou regarde ki parti politik ou ti vote pour. Nou pa pou regarde ki fanmir ki ou sorti ladan. Nou pe vin apre ou.

La mon anvi osi dir avek *ANB*, zot osi tou, nou pe vin netway zot!

**(APPLAUSE)**

### **PRESIDENT WAVEL RAMKALAWAN**

Nou pou bezwen annan nou en lorganizasyon ki konbat kont drog e non pa ki bann akonpli bann trafiker.

Alors si ou dan *ANB* ozordi e ou travay se koman en akonplis, mon ti ava konsey ou, ozordi Vandredi, Lendi bomaten al kot Komisyoner e prezant ou demisyon. Sa i ava meyer keksoz pou ou fer!

**(APPLAUSE)**

### **PRESIDENT WAVEL RAMKALAWAN**

Nou pou an menm tan osi, e mon kontan ki Sef Ziz i la. E la mon adres, parey i pe dir, dan mon rol koman Sef D'Eta, mon anvi osi dir avek Sef Ziz, Zidisyer i bezwen li osi zwe son rol dan en fason efektiv.

Zidisyer Msye Sef Ziz, fodre pa ki i *involve* dan koripsyon. Mon ti ava demande ki nou ganny nou en Zidisyer ki vreman delivre lazistis, ki ed nou pou nou *attend* sa bann standar ki nou pe rode.

E mon'n fer en lapel osi avek tou bann Ziz, e parey ou konnen Msye Sef Ziz, ou avek mwan nou'n annan bokou konversasyon. Mon'n osi annan konversasyon avek Prezidan Lakour D'Apel.

E mon'n met klerman devan zot, ki poudir dan mon responsabilite, mwan mon bezwen asire ki poudir pei i mars lo en standar ki akseptab. E mon annan tou konfyans ki poudir sa nouvo Zidisyer i ava kapab fer sa travay pou ede dan sa lalit pou nou kapab ariv en standar ki pli o.

Mr Speaker, mon realize ki mon'n koz pou pres lerdtan edmi. E letan mon pe konklir, mon anvi ankor enn fwa fer en lapel pou linite dan nou pei. Fer en lapel pou rekonsilyasyon serye dan nou pei.

Mon fer en lapel pou nou retourn ankor lo preanbil nou Konstitisyon, ki fer nou sa ki nou ete koman en pep. En pep fyer ki'n sorti dan tou kwen lemonn.

En pep fyer avek tou son bann krwayans relizye pou nou rekonnèt kanmarad e pou nou viv dan larmoni. En pep ki devret debout fyer letan i tann son Lim Nasyonal i zwe. Parski sa Lim Nasyonal i devret bat dan pli profon on leker.

En pep ki letan i regard son paviyon, i realize ki poudir se sa senbol ki ini nou tou. Alor pep Seselwa mon demande ki nou kontinyen viv dan larmoni. Nou kontinyen viv dan respe.

E toulezour letan nou leve, nou rode ki mannyer pou nou kapab fer sa pei bouz pli devan. Nou rode ki mannyer nou kapab fer ki sak zanfan Seselwa i ava kapab ganny sa ki meyer. Ki larises nou pei i ava ganny partaze avek tou son zanfan.

Wi Mr Speaker mon anvi letan mon pe terminen swet ou bonn sans dan ou travay ki ou annan pou fer letan ou pe diriz Lasanble Nasyonal.

Mon konnen ki poudir byento la zot pou annan bann travay serye, spesyalman letan zot ava pe regard Bidze. Me an menm tan osi, mon konnen ki poudir Lepep Seselwa i kontinyen regard ver zot pou direksyon.

Zot koman bann Manm Lasanble, kontinyen fer sa bon travay ki zot pe fer. Kontinyen ekout Lepep Seselwa. E annan sa lasirans ki poudir zot annan zot en Gouvernman ki pou ekout zot, en Gouvernman ki pou pare pou donn zot koudmen, en Gouvernman ki pou akonpany zot.



Mr Speaker mon'n debout toultan pou la demokrasi, pou laliberte e pou loportinite egal pou tou zanfan Seselwa. Ozordi ankor enn fwa, mon re komet mon lekor pou sa bann menm prensip.

Zot kapab reste asire ki zot annan en Dirizan ki ekout tou dimoun avek menm zorey. En dirizan ki anvi war nou pei pas atraver sa kriz ekonomik. Oubliy sa sityasyon COVID e debout fyer koman Seselwa.

Mon termin avek parol sa poenm ki sa zenn Amerikenn ti resite zour ki Prezidan Biden ti vin Prezidan. Sa fraz ki'n tous mwan plis, i dir, *"There is always light, if only we are brave enough to see it.*

*If only we are brave enough to be it".*

An dot mo, i toultan annan lalimyer si nou ase brav pou nou war li. Si selman nou ase brav pou vin sa lalimyer ki nou tou dan nou pei Sesel nou ganny sa kouraz pou nou vin sa lalimyer pou ekler nou pep, pou fer nou Nasyon mars pli devan.

E mon demande ki nou mars dan sa lalimyer e ki nou demann Bondye Tou Pwisan pou beni nou, pou beni nou pei ozordi e pou touzour. Mersi bokou.

**(APPLAUSE)**

### **MR SPEAKER**

Mon oule premyerman eksprim mon regre pou sa lensidan enteripsyon ki'n arive dan lasal letan Prezidan ti pe fer son diskour. Mon konsider li en mank respe serye e mon pou pran li serye.

Mon prezant mon leskiz avek Prezidan pou sa lenteripsyon. Mon ti a kontan remersye tou nou lodyans an deor.

Lepep Seselwa, menm bann dimoun ki kontan Sesel e ki konsernen avek Sesel aletranze, ki osi pe swiv tou nou bann levennman e nou bann deliberasyon tre pre.

Mon remersi nou bann Envite Distenge pou zot prezans isi e pou zot latansyon.

Mon remersye bann Manm Onorab pou zot prezans e zot latansyon. Mon remersi Prezidan Larepublik pou son diskour. E avek son diskour, mon krwar in prezant nou Lasanble avek plizyer pwen ki nou pou debat lo la, e nou pou eksprim nou lopinyon lo la.

Mon demande ki nou pou fer li avek respe lopinyon tou dimoun, tou kote. Prezidan, mwan personnelman mon oule zwenn ou lo 2 pwen ki ou'n fer dan ou diskour.

Premye se lo linite nou Nasyon e dezyenm se pou nou pep Seselwa travay dir pou tir sa pei dan kriz ki nou ladan e pou anmenn li devan dan prosperite.

Avek sa mon a dir nou Lasanble pou rebran Lendi bomaten 9er. E parey koutim, nou pou komans avek repons dirizan *Leader* Lopozisyon, dirizan *Leader* Biznes Gouvernman dan Lasanble e swivi par repons lezot Manm. Mon a dir zot mersi bokou ankor e nou a *adjourn* pou ozordi. Mersi.

**(ADJOURNMENT)**